

Taki fu ministri Kajsa Ollongrin fu Kondre Afersi nanga Kownukondre Tori na a memre fu Manspasi na ini Ptatakondre (1 Yuli 2021).

Na wan prenki fu fo sèntimeyter nanga dri skrifmarki, san meki fu isri. WIC skrif na ini. Nanga a brantmarki disi West Indische Compagnie ben bronmarki mansma, uma nanga pikin di den ben meki tron srafu. Leki den libisma disi ben de wan meti.

Disi den ben du, baka di den ben lobi oli gi a heri skin fu den srafu. Dan den ben masi a faya isri tapu den srafu skin-buba. Na hati hati soro den ben krin nanga strun watra nanga kroyti. A sma di ben pasa a watra disi ben tron a gudu fu wan srafu eyginari, so dati te a ben lowe, sondro draydray den ben kan si suma na a eyginari.

Den libisma di den ben meki tron srafu no ben lasi den skin nomo. Den ben lasi den nen sosrefi. Na Afrikan nen di den bigisma ben gi den nanga lobi ben musu dri gi wan nyun nen. Wan weti-buba nen di a katibomasra ben man taki sondro aka-aka. So meki ini a ten dati den srafu ben kisi a nen fu Klaas, Jan noso Eva.

Te wan tra katibomasra ben bay wan srafu, furu leysi a srafu ben kisi wan tra nen baka. Dan den ben kisi wan nyun bron marki. Den srafu no ben teri srefi srefi leki libisma.

Erfu milyun kan-kan libisma rutu ben hari komopo na a wan sey fu a bigi watra di den kari “Atlantische Oceaen tyari go na tra sey. Fo hondru fotenti na feyfi dusun (445.000) fu den libisma disi doro na den Ptata koloni. Wi no sabi omeni suma lasi libi fosi den doro.

Tide wi e memre, wi e teki wan momentu fu prakseri na historia disi bikasi na a fosi dey fu Yuli, wan-dusus ayti hondru siksi tenti na dri (1863), wan hondru feyfitenti yari di de na wi baka, katibo-ten ben kon tapu na Sranan nanga den kondre di ben abi a nen bifo fu “Nederlandse Antillen”. Ete a katibo no ben tapu tru tru. Den ‘fri’ suma ben abi fu wroko tin yari ete na ini den pranasi.

Te wi e dray luku na wi baka, te wi e memre a ten disi fu a katibo historiya, syen, bita-ati firi nanga sari-ati firi, firi fu begi pardòn, na den firi di wi e firi. Na wan pisi historiya di e tay unu, un wani efu un no wani. Un kan opo un ay noso tapu un ay, ma san pasa, pasa. A kan de krin krin noso kibri fasi na ini wan famiri historiya san ala suma no sabi.

A no swaki yu swaki te yu e suku krin taki fu sani di pasa. Na so fasi demokrasiya e sori en krakti. Fu kisi wan moro betre tamara wi abi fu luku den marki di tan abra. Dati a no bugu bugu, ma wan prensari sani fu du.

Anton De Kom ben skrifu “*Wan folku no sa man gro tru tru efu a e tan waka nanga sakafasi-firi noso syen*”. De Kom ben opo un ay fu sori un den hati leba fu katibo nanga desko, ma a ptata lanti no ben triki en wan leti fasi. Dati meki a de fanowdu fu opo en baka wan lespeki fasi nanga grani di fiti.

Dri yari pasa, mi ben tanapu na a srefi presi disi tu. Te mi e dray luku tide, mi e si taki son sani kenki kon seti pikinso. Sosrefi mi e si taki furu wroko de fu du ete.

Baka a priti-ati dede fu George Floyd a yari di pasa, furu hondru milyun libisma na heri grontapu go na strati. Sosrefi tu na Ptatakondre. A ben sori krin taki a bita-ati du fu desko no komopo ete fu wi libimakandra, ma wan takimakandra bigin, san o tan go nanga langa.

Nowan sma wan yere taki a e desko, ma dati no wani taki yu kan tapu yu ay gi desko noso gi suma di e feni en srefi moro betre leki wan trawan. Son ten yu kan sori finga makriki go na bita-ati nanga desko. Ma moro furu yu no o si den sani disi krin. Ma yu kan dray en fa yu wani, ini a aladey-libi wi e miti a kruktu du disi ete. Sonten kibri fasi, sonten krin-krin.

- Na fosi leysi yu kisi wan todo noso te yu go suku wroko noso wan presi fu leri wan wroko.
- Den e tapu doro gi yu te yu e go na wan dansi-oso.
- Waktiman di e tan waka na yu baka na ini wan wenkri.

Den keti koti, ma a pasi langa ete fu tru. Leki lanti wi musu gi wan bun eksempre. Lanti musu man fu sori, feni nanga feti den desko na ini a libimakandra. Den krin krin desko nanga den kibri fasi desko. Den desko di e meki taki son suma no e firi fri, di e meki taki ala libi suma no e firi switi.

A fini fu a wroko sa teki presi nanga yepi fu wan “Staatscommissie” nanga wan “Nationaal Coördinator tegen Discriminatie en Racisme”.

Sosrefi na ini a yari tudusuntutentinadri 2023 un wani fu memre tapu wan grontapu warti fasi taki wan hondrufeyfienti (150) yari fu tru a katibo ben kon doro wan kaba, na tapu 1 Yuli 1873.

Tide, a orga fu gi granlanti ray, sobun a “Adviescollege Dialoog Slavernijverleden” fu Ptatakondre pristeri en ray. A orga feni taki a ten fu katibo musu tron a memre fu a heri kondre, a heri libimakandra:

- ondrosuku san na a prati fu granlanti ini a katibo du
- prati leri, nanga
- wan museum spesrutu fu sori san na katibo.
- Wan kondre memre dey.
- Wan prenspari sani san a Adviescollege wani taki granlanti fu Ptatakondre musu aksi pardòn fu den katibo du.

Den ray disi funamku, den e tenapu steyfi-steyfi. Un no man du tra fasi. Mi srefi e firi a srefi fasi, mi e brasa den ray disi en feni taki wi no musu lasi ten. Damsko, Porifoto (Rotterdam) nanga Utkra (Utrecht) du den historiya ondrosuku wroko keba. Den Haag e seti kon tu. Den wethouder fu den fo bigi foto srefi tu, feni taki a de fanowdu fu u abi wan kondre memre dey fu katibo ten.

So fasi, te wi e memre den katibo ten, makandra wi sa man seti wan moro betre tamara, wan libimakandra pe wi kan meki wan kofu fu feti desko, fu aba wan libimakandra pe alasma abi a srefi okasi fu libi wan warti libi. Wan libimakandra di e poti ferantwotu pe ferantwotu musu poti.

Nownow, krosbey, na ini Rijksmuseum, wan grontapu moy pristeri de fu si, di e meki wi firi a dungru nanga kruktu fu den katibo-yari. Mi sabi taki a bron-isri di mi ben tyari

kon na fesi de drape tu. Leki fa mi tenapu dyaso, a gersi leki mi e firi fa a isri e bron go na ini a skin fu den tro tro, taki a pen san den ben firi no gwe ete. Taki den soro di den kisi no dresi ete. Na wan langa pasi di e teki omeni yari moro ete.

A filosofiyaman Augustinus ben skrifi moro leki wandusunsikshondru yari (1600) pasa: Howpu ben abi tu kfalek moy umapkin, "Atibron" nanga "Deki-ati". Atibron fu den sani san pasa nanga Deki-ati fu bribi taki wan moro moy ten sa doro, taki kenki sa kon.

Mi e denki taki a koniman disi abi leti.

Fu doro makandra pe wi musu doro, presi musu de gi ala tu.

- Atibron fu di wi e memre wan sari esrede.
- Atibron fu di te tide wi e si taki marki e marki nanga tu lati.
- Atibron fu di kenki no e waka esi-esi.

Ma deki-ati na a tra pisi san de fanowdu

- Deki-ati fu si na atibron nanga a pen fu trawan.
- Deki-ati fu wi si esrede leki wan sani fu wi alamakandra.
- Deki-ati fu taki krin-fasi nanga makandra.

Bika te fu kba, dati na a tori. Wi no musu si trawan leki feyanti, ma leki kompe. Wi musu leri fu si grontapu nanga den ay fu wi kompe. Ibri dey, a winsi sonten a hebi, a winsi sonten a e gi soro-ati.

Mi e taki yu grantangi fu di yu teki yesi arki mi.